

SENT



Niculin Janett, Madlaina Janett, Sara Bigna Janett, Barbara Gisler, Curdin Janett e Cristina Janett illa fuormaziun «C'est si B.O.N.» d‎ur‎ant il concert da venderdi saira illa baselgia San Lurench a Sent.

FOTO BENEDICT STECHER

Andri Gritti vess gnü ün milli gust dal sal e paiver

Il festival da musica «Cun sal e paiver» es gnü organisà a Sent als 10 ed 11 lügl 2026 in algordanza dad Andri Gritti. Tschinch concerts cun musica in differents stils illa baselgia San Lurench e cun restoraziun illa Chasa Misoch han rendü omagi al «bap dal festival».

BENEDICT STECHER/FMR VALLADER

Andri Gritti cun sia duonna Gianna Bettina Gritti ed amis han pisserà d‎ur‎ant divers ons per arrandschamaints musicals e d'oter gener cultural illa regiun. Ed els han inrichi uschea la vita culturala a Sent e contuorns. Els han eir adüna collavurà culla sporta culturala da la Grotta da cultura ed han organisà prelecziuns, concerts, exposiziuns ed oter plü.

In algordanza da l'organisatur

In schner da quist on es Andri Gritti (1957–2026) mort davo lunga malatia. Per s'algordar da quist promotur da cultura regiunala ha gnü gnü lö la fin d'eivna passada «seis» festival da musica «Cun sal e paiver» ch'el svesse vaiva miss in pè suot il motto «In algordanza ad Andri». Id ha dat duos concerts in venderdi e trais la sonda illa baselgia San Geer a Sent.

D‎ur‎ant las posas, tanter ils differents concerts, han ils preschaints e las preschaintas gnü l'ocasiun da tour ün süerv ed üna boccada illa bar da la Chasa Misoch. 15 fin 20 musicistas e musicists, chantaduras e chantadurs han pisserà per üna sporta musicala d'ota qualità – da musica populara fin pro'l jazz. Ils concerts sun stats bain visitats ed han rendü ün bel omagi ad Andri Gritti chi s'ha ingaschè cun corp ed orma per üna viva sporta culturala in ed in tuorn cumün.

«A family affair» e «C'est si B.O.N.»

In venderdi passà han gnü lö duos concerts chi han dürà minchèin var ün'ura. Il prüm concert cul titel «A family affair», cun Miriam Cipriani (flöta a travers) e Stefano Sposetti (clavazin), ha manà tuns loms ed amabels illa baselgia San Lurench.

Il seguond concert dal venderdi culla gruppa «C'est si B.O.N.» ha fat dudir tuns da jazz cun blera ritmica e surpraisas musicalas. Tras il concert ha manà Madlaina Janett. Il public ha dudi musica da different gener, da «La marcha da Barnabà» fin pro ouvas cun sü ün buol da jazz. Las müdadas d'instrumaints han pisserà per gronda variaziun ed in divers tocs s'haja dudi solos da saxofon e perfin dal giün e dals cellos.

Cun omagi eir per Paulin Nuotclà

Ils musicists da «C'est si B.O.N.» sun stats Barbara Gisler (cello, giün e chant), Cristina Janett (cello e chant), Curdin Janett (orgel da man, giün e chant), Madlaina Janett (viola e chant) e Niculin Janett (saxofon e chant). Pro ün toc chantà d'eira eir Sara Bigna Janett da la partida. Las quatter duonnas han chantà üna chanzun tirolaisa cun gronda precisiun ed ardur. Sara Bigna Janett ha lura chantà cun accompognamaint musical «Das Tragliun» da Paulin Nuotclà, il chantatur barmör. «Schabain cha meis bap, Jachen Janett ha trat il nas da quell'idea, tilla chanta uossa listess», ha la chantadura tradi in venderdi. Cun bler senti-

maint ha ella lura chantà amo «Sper il mar», eir da Paulin Nuotclà – accompagnà il prüm fich dezaintamaing cul orgel da man da Curdin Janett, e pass a pass sun eir pro quella chanzun gnüts pro oters instrumaints. Ün concert cul predicat «no limits» chi ha tratgnü üna baselgia bain implida in möd cumpetent e cun bleras surpraisas.

«Cun cuaida e plaschair»

In sonda vers saira han lura gnü lö trais ulteriurs concerts – ün davo tschel tanter las 17.00 e las 22.00. Ün prüm concert es stat üna produenziun cun ün coro cun chantaduras e chantadurs da differents progets e cun accompagnamaint musical da Curdin Janett, Madlaina Janett, Cristina Janett e Barbara Gisler. Lura es seguida la Schubertiada cun Operetta Ardez – cun musica da Johannes Brahms, Bernstein fin pro Udo Jürgens. Da la partida d'eiran Sara Bigna Janett (sopran), Gianna Lunardi (mezzosopran), Chasper Curò Mani (bariton) e Zoi Tsokanou (clavazin).

L'ultim concert dal festival ha gnü lö a las 21.00 culs Fränzlis da Tschlin cun musica populara tradiziunala da l'Engiadina e «cun cuaida e plaschair» tras tuot ils stils musicals pussibels. Ils concerts dal festival musical «Cun sal e paiver» sun stats bain visitats ed han preschantà musica per mincha gust da buna qualità. Sainza dubi: Andri Gritti vess gnü «cuaida e plaschair» ed ün milli gust da tuot il sal e paiver.

TEIR

Tiradours grischuns on miro precis

Treis victorgias, quatter posts da podest ed endesch posts da top-ten pigls tiradours grischuns. Chegl tradescha en sguard detaglio ainten la rangaziun finala digls diesch stetgs tg'en nias tratgs dalla Festa federala de teir 2026.

La Festa federala da teir 2026 a Coira ed ainten 19 oters lis digl Grischun è istorgia. Er ord vista grischuna è ella stada en success. Chegl betg angal per Georg Maurer da Favogn, igl rètg-tiradour, mabagn er per oters tiradours digl Grischun tgi on miro e tutgia precis. Radond 2500 tiradours e tiradouras digl Grischun èn sa participos all'occorrenza da teir naziunala igl zarcladour e fanadour 2026. Igls pi blers participants èn nias digl cantun Berna, en cantun noua tgi igl teir ò anc gronda tradiziun.



Perveia dall'annada pi giova ò Romeo Poltera da Savognin betg gudagnea igl steg «uniun» cun l'arma 57/03.

Romeo Poltera: plaz 2 da 6000 tiradours

Tratgs èn nias dalla Festa federala da teir sen la distanza da 300 meters diesch stetgs. Chegl mintgamai an treis categorias. La categoria A cun l'arma da sport, la categoria D cun l'arma 57/03 e la categoria E cun l'arma 90.

Ena victorgia dopla pigl Grischun ògl do tigl steg «uniun» ainten la categoria D. Gudagnea chel steg ò cuagl resultat da 99 puncts, da 100 puncts pussebls, Werner Natter da Tumeigl. Er fatg 99 puncts e sto alla testa dalla rangaziun anfignen prest alla fegn dalla festa è Romeo Poltera da Savognin. El è dall'annada 1971 – ed igl victour da chel steg è dall'annada 1963. Igl è uscheia tgi per la rangaziun è dasper igl resultat er l'annada decisiva. Vot deir tgi igl tiradour pi vigl è ainten la rangaziun adegna rango migler. Per Romeo Poltera è chel sagond post tigl steg «uniun» egn digls gronds success an sia carriera.

Andrea Stiffler, igl matscheur da Tavo ò gudagnea igl steg «capricorn» dalla categoria D, en steg tgi 4344 participants on er tratg. Igl terz victour grischun è Mario Feuerstein da Zuoz cun annada 1956. El è egn digls 45 tiradours tg'on sagetto igl resultat maximal da 60 puncts da total 1779 participants sen chel steg categoria arma da sport.



Dario Jäger da Cunter, tiers seis 10 da fila ed igl maximum da 60 puncts, è rango «angal» sen plaz 46 digl steg «seria» arma da sport.

FOTOS GION NUTEGN STGIER

Er fatg 60 puncts ed «angal» plaz 46

Tratg chel steg scu Mario Feuerstein ò er Dario Jäger da Cunter. Igl tiradour è dall'annada 1998 e totga ainten la regiun tar egn digls gronds talents. Cun esser egn digls pi giovens tg'ò er fatg igl maximum da 60 puncts ògl alla fegn finala tanschia per el «angal» per plaz 46 da 1779 participants.

Dasperas Romeo Poltera on anc ulteriours treis tiradours grischuns gia da sa cuntantar cun plaz dus ainten oters stetgs. Chegl èn igl Engiadines Mario Feuerstein, Marco Hassler da Jenins e Beat Rodigari da Puntraschigna.

Tar la rangaziun dallas secziuns ò ainten la categoria da fermezza 2 triumfo la secziun da Sedrun-Tujetsch ena rangaziun cun 440 secziuns. La secziun da Surses è rangada sen plaz 8. Plaz 4 ògl do ainten la categoria da fermezza 4 per l'Uniun da teir Chalavaina.

Igl setg tg'è nia tratg igl pi savens è igl steg «cran» cun 12665 participants e participantas.

Gion Nutegn Stgier

